



*Le petit Tobie ayant épousé Sara fille de Raguel, & recourré l'argent de Gabel, retourne vers son pere, qui fut guarý de sa veuë, par le fiel du poisson.*

**L'**ANGE Raphaël ayant aduertý le petit Tobie de son deuoir, & qu'il n'auroit aucun mal en épousant Sara, ils allerent loger chez Raguel, lequel les ayant receus & reconnu Tobie pour fils de son frere, luy accorda sa fille; & leur prenant les mains dextres, Le Dieu d'Abraham, d'Isaac & de Iacob, dit-il, soit avec vous, & vous conioigne ensemble. Apres le souper, comme Tobie eust esté mené à sa femme, se souuenant de ce que l'Ange luy auoit dit, ne faillit de mettre le foye du poisson sur les charbons, disant; Sara prions Dieu ces trois nuits. Et lors Raphaël prit le Diable, & le lia au plus haut desert d'Egypte. Cela fait, Tobie appellant l'Ange, le pria d'aller vers Gabel en la Cité de Rages, pour retirer les talens d'argent que son pere auoit baillez; ce qu'il fist, & Gabel mesme vint aux nopces. Icelles estant accomplies, Tobie retourna vers son pere & sa mere, qui estoient en merueilleuse peine pour son absence: laquelle toutesfois fut conuertie en joye, tant pour son retour, qu'à cause que ce bon homme recouura la veuë par le moyen de ce fiel de poisson, appliqué sur les yeux. Comme doncques le fils racontoit à son pere l'assistance que luy auoit fait Raphaël, & deuisoient de la recompense qu'on luy pourroit donner, il se manifesta estre l'Ange du Seigneur, enuoyé pour leur salut, puis s'éuanouit de leurs yeux.